

# U Homsu poginulo najmanje 67 osoba

8 februar 2012 Izmijenjeno 12:32 CET

**Sirijske snage bezbjednosti ubile su najmanje 20 osoba kada su upale u tri kuće u predgrađu žarišta pobune protiv Assada**



Prema podacima UN-a, u Siriji je tokom pobune protiv vlasti Bashara al-Assada ubijeno najmanje 5.400 osoba [EPA]

Sirijske snage bezbjednosti nastavile su bombardiranje stambenog dijela grada Homs, u kome je poginulo najmanje 67 osoba, saopćili su u srijedu aktivisti i opozicioni izvori.

## TURSKA INICIJATIVA

Turska radi na tome da "u najkraćem roku" s regionalnim i međunarodnim akterima organizira međunarodnu konferenciju o sirijskoj krizi, izjavio je u srijedu ministar vanjskih poslova Ahmet Davutoglu. "Odlučni smo uspostaviti forum na proširenoj osnovi za međunarodno dogovaranje sa zemljama koje su zabrinute za situaciju u Siriji", kazao je on za informativni kanal NTV. Davutoglu je rekao da bi se ta konferencija mogla održati u Turskoj ili u nekoj drugoj zemlji, ali da bi se trebala odvijati u regionu i u "najkraćem roku". Turska vodi aktivnu diplomatiju kako bi se utvrdila "nova mapa puta" za Siriju, kazao je ministar.

Prema riječima aktiviste Mohammada Hassana, u Homsu je od ponoći ubijeno 47 osoba, prenosi Reuters. Sirijske snage bezbjednosti ubile su najmanje 20 osoba kada su upale u tri kuće u predgrađu Homsa, saopćila je sirijska organizacija za ljudska prava sa sjedištem u Londonu. Prema riječima šefa te organizacije Ramija Abdelrahhima, snage sirijskog predsjednika Bashara al-Assada su tokom noći pobile petočlanu porodicu u jednoj, sedmočlanu porodicu u drugoj i osmočlanu porodicu u trećoj kući.

**Napadi na Homs su nastavljeni iako je Rusija dobila obećanje od Assada da će zaustaviti krvoproliće u zemlji.**

AP je preneo saopćenje iste organizacije da je u bombardiranjima u okruzima Bajadah, Baba Amr, Haldijeh i Karm al-Zejtoun ubijeno na desetine ljudi. Prema riječima Omara Shakera, aktiviste iz okruga Baba Amru, u tom okrugu je ubijeno pet osoba. Aktivista Mohammad Hassan je izjavio da su vojnici ušli u bolnicu Hikmen, da su komunikacije u prekidu u mnogim dijelovima grada, a da tenkovi idu ka rezidencijalnom dijelu grada. Napadi na Homs su nastavljeni iako je Rusija dobila obećanje od Assada da će zaustaviti krvoproliće u zemlji.

## Assad obećao referendum

Šef ruske diplomatije Sergej Lavrov izjavio je u srijedu u Damasku da je Assad spreman u bliskoj budućnosti raspisati referendum o novom ustavu Sirije. Assad je, prema riječima Lavrova, spreman na dijalog sa svim političkim snagama u zemlji, dok će Moskva raditi sa sirijskom opozicijom na smirivanju situacije i okončanju nasilja.

Rusija i Kina uložile su u petak veto na prijedlog rezolucije o Siriji Vijeću sigurnosti Ujedinjenih naroda (UN), za koji je glasalo preostalih 13 država članica. Lavrov je objasnio razloge za ruski veto i tom prilikom naveo problematične prijedloge da se sirijska vojska jednostrano povuče iz gradova u kasarne, kao i da se dijalog među sirijskim stranama vodi s unaprijed određenim ciljem. Lavrov je u srijedu rekao da Assad želi da njegov potpredsjednik Faruk al Shara razgovore s opozicionim snagama. Šef ruske diplomatije je kazao je da je Assad "povjerio odgovornost za slične razgovore svom potpredsjedniku".

Sirijska opozicija odbacuje svaki razgovor s režimom i navodi da ne prihvata ništa sem Assadovog odlaska sa vlasti. Lavrov za podsticanje nasilja u Siriji okrivljuje Assada i opozicione snage.

### 'Sukob, a ne dijalog'

On je novinarima u Moskvi rekao da na "obje strane postoje ljudi čiji je cilj oružani sukob, a ne dijalog", prenose ruske agencije. Lavrov je kritizirao u srijedu arapske i zapadne zemlje koje su pozvale na konsultacije svoje ambasadore u Siriji, ocjenjujući da je ova mjera nelogična i da ne doprinosi inicijativi Arapske lige (AL). "Ne razumijemo ovu logiku, kao ni ishitrenu odluku da se zamrznu aktivnosti posmatračke misije AL-a u Siriji", izjavio je on i dodao da ne misli da će opoziv ambasadora stvoriti povoljne uslove za realizaciju inicijative AL-a.

### Assadova porodica, koja upravlja Sirijom od 1971. godine, pripada manjinskoj šiitskoj sekti alavita.

SAD je prije dva dana zatvorila ambasadu u Damasku zbog bezbjednosnih razloga, dok su Belgija, Velika Britanija, a u utorak su Španija, Francuska, Italija i Holandija saopćile da pozivaju svoje ambasadore na konsultacije. Arapske monarhije su odlučile povući svoje ambasadore iz Sirije. Savjet saradnje arapskih država Persijskog zaljeva, u koji ulaze Bahrein, Katar, Kuvajt, Ujedinjeni Arapski Emirati (UAE), Oman i Saudijska Arabija u utorak su odlučile hitno protjerati diplomatske misije Assadovog režima, kao odgovor na eskalaciju nasilja u Siriji.

Assadova porodica, koja upravlja Sirijom od 1971. godine, pripada manjinskoj šiitskoj sekti alavita, a zvanični Damask za nasilje optužuje "terorističke grupe".

UN su saopćile da je broj žrtava 10-mjesečnih nemira u Siriji premašio 5.400, a da je najmanje 400 ljudi ubijeno od dolaska posmatračke misije AL-a u ovu zemlju 26. decembra prošle godine.

Izvor: Al Jazeera